

# Anem Òc ! per la lenga occitana !

## *Crida per la manifestacion dau 24 d'octobre de 2009 a Carcassona*

Aparar la diversitat linguistica e culturala dins lo monde es per leis annadas que vènon una escomessa dei grandas. En França, pasmens, la situacion legala es desfavorabla a-n-aqueu aparament. La lenga occitana, especialament, se tròba ben macada perque avèm ges de politica positiva per sa transmission.

Fa donc mestier, dins lo territòri onte se parla la lenga d'Òc, crear un environament favorable per l'ensenhament de la lenga e en lenga, per la creacion culturala en occitan, per la preséncia de la lenga nòstra dins lei media electronics, audivisuaus e escrits, per son emplec dins la vida publica e sociala. Tot aquò favorizarà la transmission de la lenga dins lei familhas.

### **Lei media**

Volèm un servici public de ràdio e de television en occitan.

Demandam una ajuda especifica per leis operators privats (ràdios associativas, premsa, television) qu'òbran per la lenga.

### **La creacion**

Lo sosten a la creacion, aquò vòu dire una politica especifica per promòure l'edicion, lo teatre, l'espectacle viu en generau, lo cinema e la musica. La poblacion dèu posquer descobrir una cultura tròp sovent esconduda.

### **L'ensenhament**

Fau que cadun pòsque chausir, se o vòu, un ensenhament sota de fòrmas variadas :

- un ensenhament en occitan (bilingue a paritat orària o immersion) ;
- un ensenhament de la lenga e de la cultura occitanas ;
- un ensenhament especific vèrs leis adults.

Avèm besonh d'una politica d'ofèrta generalizada.

### **La vida publica**

La lenga d'Òc dèu èstre presenta dins la vida publica; aquò vòu dire per exemple :

- lo respect de la toponimia e la messa en plaça d'una sinhalizacion bilingua ;
- un encoratjament a emplegar la lenga dins lei luecs publics e dins la vida sociala.

Aquelei demandas an una tòca unenca : que la lenga nòstra pòsque viure e que toteis aquelei que o desiran pòsquen l'emplegar. S'adreïçan au còp ai collectivitats locals occitanas (comunas, comunautats de comunas, departaments, regions) e a l'Estat. Cadun se deu encargar de çò qu'es de sa responsabilitat. Revèn a l'Estat d'adaptar sa legislacion.

### **Coordinacion Anem Òc !**

Institut d'Estudis Occitans, *organisme culturau reconegut d'utilitat publica*

Felibrige, *movement de defensa de la Lengua d'Òc*

F.E.L.C.O. *Federacion deis Ensenhaires de Lengua e Cultura d'Òc*

Calandreta, *escòlas occitanas associativas laïcas*

Òc-Bi, *associacion de parents d'escolans per l'ensenhament bilingüe public*

Coordinacion Anem Òc !

IEO, FELCO, Calandretas, Oc-Bi, Felibrige